

# Levrig orañjez Ai'ta!

Ul levrig divyezhek diwar-benn ar bodad difenn ar yezh Ai'ta! zo bet lakaet er gouloù nevez zo gant Yoran Embanner. Petra a gaver e-barzh *Disentiñ evit ar brezhoneg - Désobéir pour la langue bretonne?* Sed un tamm kinnig gant izili eus ar strollad.



Ai'ta! e ti-gar Kemperle, evit nac'h e vefe kinniget ar brezhoneg evel ur yezh estren war ar panelloù.

**Petra a gaver el levrig-mañ? Ouzhpenn ur renabl eus obererezhioù Ai'ta! eo moarvat?**

Danvez kentañ al levrig eo kontañ dek bloavezh stourm strollad Ai'ta!. An oberennoù, evel-just, hag ivez ar vuhez tro-wardro: luskañ ar strollad, prientiñ mont war an dachenn, al lizhiri pe an emvodoù... Un toullad luc'hskeudennoù zo evit gellet ober un taol sell war-gil.

Ul levrig e div yezh an hini eo, rak kontet e vez istor ar strollad e galleg ha divizet ez eus bet embann testenioù hag eñvorennoù e brezhoneg dre reiñ ar gaoz d'ar stourmerien ha d'ar stourmerezed.

Magañ ar preder a glasker ivez pa lakaer ar gaoz war stad ar brezhoneg hiziv an deiz, dibaboù strategel graet gant Ai'ta! pe c'hoazh ar stourm evit hor yezh en amzerda-zont. Evit mont donoc'h gant ar prederse hon eus pedet Herve Bihan da skrivañ ar raskrid ha Ronan ar C'hoadig da ginnig un dielfennadur evit klozañ al levrig.

**Soñjal a ra deoc'h e treuzintet tud zo palioù pe mennozhioù ho strollad?**

Kredapl ez eus tud hag o deus ur sell amsklaer pe gamm war ar pezh eo strollad Ai'ta!, koulz hag ar pezh zo bet graet gantañ betek-henn. N'eo ket didalvoud sklaeraat ar jeu eta.

**Gwechoù zo e c'heller soñjal n'eo ket sklaer ha kadarn ar pezh a fell d'ar vrezhonegerien o-unan, evel statud lezennel ar yezh...**

Unan eus ar c'hudennoù brasañ war tachenn ar yezh an hini eo hiziv an deiz evit mont war-raok. Ma ne ouzomp ha ne embannomp ket ni hon-unan, brezhonegerien, da belec'h e fell deomp mont, ne vo ket gounezet tra ebet. Ha padal, n'eo ket ken diaes-se da dermenañ.

Gellout bevañ e brezhoneg e Breizh eo ar pal, hag ur bazenn bouezus da dizhout zo gounit ur statud ofisiel evit hor yezh. Diwar hor stourmoù hag an araokadennoù pleustrek war an dachenn e teuo kement-se da wir, ha neket dre un diviz o tont diwar laez. Mont war-raok zo ezhomm: sikour ar familhoù da adperc'hennañ ar yezh, diorren ar c'hellenn evit ma c'hello pep bugel e Breizh deskiñ brezhoneg, abadennoù a-zoare bemdez er skinwel hag er radio, teknologiezhioù nevez e brezhoneg, brezhoneg war pep panell ha savadur...

Ret eo krediñ lavaret fraezh kement-mañ. E Korsika pe en Euskadi e lavaront sklaer ar pezh a fell dezho, gant palioù resis war hir dermen, hag ez eont war-raok un tamm mat fonnusoc'h. Goulenn jentilik

n'eo ket trawalc'h, ezhomm zo da sevel traoù hon-unan koulz ha rediañ ar re zo ar galloud ganto da lezel peadra deomp da vont war-raok.

**Ur c'hraf pouezus a venegit er skrid-kinnig: an diouer a legadiñ a rumm da rumm e Breizh, evel ar yezh evel-just, hag en emsav ivez, e-keñver stourmoù gwechall. Fellout a ra da izili Ai'ta! cheñch ar pleg-se?**

En ur vont gant hon hent hon eus bet tro da zizoleiñ tamm-ha-tamm taolioù bet kaset da benn en amzer dremenet gant tud all (SAB, Dazont, UGB...). Ma ouife ar rummadoù yaouankañ-tout an traoù-se e vefe aesoc'h dezho kregiñ e-barzh d'o zro ha mont war-raok, kentoc'h eget adijinañ traoù bet graet hag amprouet gant lod all arozomp? Unan eus palioù al levrig-mañ eo neuze reiñ ur banne sklêrijenn war al labour graet gant Ai'ta! abaoe 2005. Ra servijo da lod all, abred pe abredoc'h, evit plantañ e-barzh an efedusañ ar gwellañ, evit hor yezh.

**Komzoù dastumet gant M.L.**

*Disentiñ evit ar brezhoneg - Désobéir pour la langue bretonne* gant stourmerien Ai'ta!, embannet gant Yoran Embanner (16€ an tamm).

Evit gouzout hiroc'h:  
<http://ai-ta.eu>  
[www.yoran-embanner.com](http://www.yoran-embanner.com)